

Mahasiswa UMP curah bakti bersama masyarakat Laos dan Thailand



Kuantan, 3 Mac- Seramai 18 orang mahasiswa Universiti Malaysia Pahang (UMP) dapat mencurahkan bakti dan menjalankan kerja khidmat komuniti dengan membina kemudahan dan fasiliti di masjid di daerah Nong Khai, Thailand dan Vientiane, Laos dalam Misi Kemanusiaan Laos-Thailand 2015 selama seminggu baru-baru ini.

Program anjuran Majlis Perwakilan Pelajar dan Kelab Perkasa, Fakulti Kejuruteraan Awam dan Sumber Alam (FKASA) ini merupakan salah satu program mobiliti pelajar tahun akhir ke luar negara untuk bertemu dengan komuniti antarabangsa dan berkongsi kepakaran serta menimba pengalaman dengan menyertai lawatan akademik ke dua-dua negara ini.

Pengarah program, Mohd. Syukran Ab. Razak, pelajar FKASA berkata, peserta berpeluang bertemu komuniti dan mengecat Masjid Azahar di Vientiane Laos serta membina kemudahan di Masjid Yayasan Assalam.

"Kami juga mengajar bahasa Melayu bagi kanak-kanak Yayasan Assalam di Nong Khai, Thailand di samping menganjurkan program perkongsian pengalaman bersama pelajar dan pensyarah di Universiti Khon Kaen kampus Nong Khai, Thailand," katanya.



Beliau turut berkongsi pengalaman ketika berada di negara yang minoritinya adalah Islam. Keadaan ini telah menyedarkannya walaupun hidup di kalangan bukan Muslim, namun ianya tidak menghalang penduduk Islam di negara ini menjalani kehidupan seharian, terutamanya dalam mencari nafkah dan bersekolah.

Katanya, masyarakat setempat dapat hidup bersama-sama dengan harmoni walaupun Islam di sana hanyalah kaum minoriti sahaja. Begitu juga dengan hasil sumbangan pihak bukan kerajaan (NGO) dari Malaysia banyak membantu penduduk di sana terutamanya kemudahan kepada masyarakat Islam untuk beribadah dan menyampaikan ilmu yang bermanfaat kepada umat Islam yang lain.



Menurut Mohd. Syukran yang merupakan pelajar tahun tiga pengajian Sarjana Muda Kejuruteraan Awam berkata, lebih membanggakan mereka program ini dapat dimanfaatkan sepenuhnya pelajar apabila mereka berjaya menghasilkan binaan untuk digunakan penduduk.

Pihaknya amat berterima kasih atas sumbangan dan sokongan pihak Persatuan Wanita UMP (Matahari) yang banyak membantu dalam mengumpulkan dana membiayai pembinaan masjid dan menjayakan misi program ini. Walaupun berdepan dengan kekangan masa yang agak terhad, hasil kerjasama yang mantap antara peserta mampu mempercepatkan fasiliti di masjid yang hampir siap sepenuhnya tidak lama lagi.

Program turut mendapat kerjasama daripada Pertubuhan Ar Rahmah Malaysia dan Yayasan As Salam Thailand.



Gambar dan berita disediakan Abdul Rahman Ahmad dari Jabatan Hal Ehwal Pelajar dan Alumni (JHEPA) dan suntingan oleh Bahagian Komunikasi Korporat PNC.

Posted By : NOR FADZILLAH BINTI ZULKIPLI Date Posted : 19-03-2015, 15:36:07